

العنزة العنيزية

كانت هون هون هالعنزة، إليها ثلاث اولاد. قامت قالت لاولادها: "خليكوا هون بدّي أجيبلكو حشيش".

هي كانت كل يوم تروح ترعى توكل وتشبع وتحسّلهن.
تيجي تقولهن:

إفتحولي يا وليداتي
الحشيش عقروناتي
والحليب بيزيراتي

بيجوا يفتحولها. قام يوم شافها الظبع وهي طالعة، عرف اولادها وين، وقال: "والله غير أروح آكلهن." وكانت هي قبل ما تطلع موصيتهن: "إذا أجا واحد عليكو وقالكو افتحولي، اصحكو تفتحوه!" وهي إمهن كان مقصوص ذيلها. قالتلهن: "إذا حدا بيجي عليكو وقالكو افتحولي أنا إمكو، شوفو إذا ذيله مقصوص وإلا لأ. إذا ذيله مش مقصوص بكون مش أنا تفتحولش".
قام الظبع راح على مغارتهن
قالهن:

إفتحولي يا وليداتي
الحشيش عقروناتي
والحليب بيزيراتي

قالولة: "دير تنّا نشوف ذيلك".

دار ذيله، وإلا هو مش مقروط.

قالولة: "روح. إنت مش إمنا".

شو بدّه يساوي؟ بدّه يعمل حيلة عليهن ميشان يوكلهن. راح عند النملة.

قالها: "قرطيلي ذيلي تنّي آكل اولاد العنزة العنيزية".

قالته: "لأ. بقرطلكاش ذيلك غير ما تروح هذاك البيدر تجيبلي صاع قمح".

اجا راح للبيدر، قاله: "يا بيدر اعطيني صاع قمح منشان أعطيه للنملة، والنملة تقرطلي ذيلي منشان آكل اولاد العنزة العنيزية".

اجا البيدر قاله: "بَنطكش إلا ما تروح تجيب الفدان يدرس علي".

راح للفدان قاله: "يا فدان، تعال ادرس عالبيدر منشان البيدر يعطيني صاع قمح، وصاع القمح

أعطيه للنملة والنملة تقرطلي ذيلي وآكل اولاد العنزة العنيزية"

قام الفدان قاله: "برحش أدرس إلا غير ما تقول للبركة تسقيني".

أجا راح للبركة، قالها: "يا بركة اسقيلي الفدان منشان الفدان يدرس عالبيدر، والبيدر يعطيني صاع قمح، وصاع القمح أعطيه للنملة، والنملة تقرطلي ذيلي وآكل اولاد العنزة العنيزية". قامت البركة قالتله: "خليه بيحي يشرب".

اجا راح الفدان شرب من البركة واجا درس عالبيدر واجا البيدر أعطى صاع قمح للنملة والنملة قرطنتله ذيله. الطبع عاود راح عند اولاد العنزة العنيزية قالهن:

إفتحولي يا وليداتي

الحشيش عقروناتي

والحليب ببيزراتي

قالوله: "فرجيننا ذيلك".

قام فرجاهن ذيله لاقوه مقروط، اجوا فتحوله، قام فات وأكلهن.

روحت العنزة لآقت الطبع ماكل اولادها. اجت راحت عند الحداد.

قالته: "اعملي قرون حديد يكونوا ماضييات كثير منشان ابجع الطبع وأطول اولادي من بطنه".

اجا الحداد عملها قرون من حديد، شو ماضييات، مثل السكاكين.

اجت العنزة لبستهن وراحت على دار الطبع. صارت تدابك على ظهر المغارة. صار الطبع

يقول: "مين اللي يدابك عظهر حيطي، كسر خوابي زيتي؟"

قالته: "أنا العنزة العنيزية، أم القرون الملوية، إطلع تاناطحك".

طلع.

قامت هي قالتله هيك بقرونها، إلا هي باعجته وطالت اولادها من بطنه.

وهاي حكايتي حكيتها، وعليكو رميتها.